

**BOSNA I HERCEGOVINA  
FEDERACIJA BOSNE I HERCEGOVINE  
VLADA**

**Prijedlog**

**ODLUKA**

**O PRIHVATANJU ZADUŽENJA PO SPORAZUMU O ZAJMU IZMEĐU BOSNE I  
HERCEGOVINE I RAIFFEISEN BANK INTERNATIONAL AG ZA FINANSIRANJE  
PROJEKTA MODERNIZACIJE UNIVERZITETA U BIHAĆU**

**Sarajevo, januar 2013. godine**

Na osnovu člana 40. stav 5. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br. 86/07, 24/09 i 44/10) Predstavnički dom Parlamenta Federacije Bosne i Hercegovine na svojoj \_\_\_\_\_ sjednici održanoj \_\_\_\_\_ godine i Dom naroda Parlamenta Federacije Bosne i Hercegovine na svojoj \_\_\_\_\_ sjednici održanoj \_\_\_\_\_ godine d o n o s i

## ODLUKU

### O PRIHVATANJU ZADUŽENJA PO SPORAZUMU O ZAJMU IZMEĐU BOSNE I HERCEGOVINE I RAIFFEISEN BANK INTERNATIONAL AG ZA FINANSIRANJE PROJEKTA MODERNIZACIJE UNIVERZITETA U BIHAĆU

#### I

Prihvaća se zaduženje Federacije Bosne i Hercegovine (u daljem tekstu: Federacija), po Sporazumu o zajmu između Bosne i Hercegovine i Raiffeisen Bank International AG, u iznosu od 5.000.000,00 EUR-a, za realizaciju Projekta modernizacije Univerziteta u Bihaću.

#### II

Sredstva zajma iz tačke I ove Odluke koristit će se za finansiranje Projekta modernizacije Univerziteta u Bihaću. Cilj Projekta je nabavka i instalacija savremene tehničke, laboratorijske i nastavne opreme za sve visokoškolske institucije na Univerzitetu. Osnovni ciljevi projekta su osavremenjivanje nastavnog procesa i podizanja opremljenosti laboratorija, kabineta i učionica te podizanje standarda nastavnog procesa i laboratorijskih vježbi na viši nivo.

#### III

Sredstva zajma iz tačke I ove Odluke, odobravaju se Federaciji pod sljedećim uslovima:

- iznos zajma:.....5.000.000,00 EUR  
(od toga se otplaćuje dio A 85% zajma u iznosu od 4.250.000,00 EUR-a i dio B 15% grant koji se ne otplaćuje u iznosu od 750.000,00 EUR-a )
- rok otplate..... 11,5 godina
- grace period:..... 1 godina
- kamatna stopa:.....0,00 %
- otplata : ..... 21 polugodišnja rata u jednakim otplatama glavnice
- troškovi marže OeKB-a ..... 1,1 %  
(podržano grantom Ministarstva finansija Austrije u iznosu od 289.031,25 EUR)
- jednokratna naknada za upravljanje na ukupni iznos zajma .....0,40 %
- troškovi za neiskorištena sredstva .....0,31% godišnje  
(u toku perioda povlačenja sredstava)

#### IV

Potvrđuje se da je razmatrana dokumentacija prihvatljiva za Federaciju, a posebno:

- Sporazum o zajmu za finansiranje Projekta modernizacije Univerziteta u Bihaću između Bosne i Hercegovine koju zastupa Ministarstvo finansija i trezora i Raiffeisen Bank International AG;
- Usaglašeni zapisnik sa pregovora.

## V

Kreditna sredstva iz tačke I ove Odluke Federacija prenosi na kreditnoj osnovi na Unsko-sanski Kanton.

U periodu implementacije Projekta, u budžetu Federacije nije potrebno osigurati finansijska sredstva za dodatno sufinansiranje Projekta.

## VI

Zadužuje se Federalno ministarstvo finansija-Federalno ministarstvo financija da sa Unsko-sanskim Kantonom usaglasi i sklopi odgovarajući Podugovor o zajmu kojim će, u svrhu redovne otplate, definirati uslove vraćanja sredstava koja se prenose na kreditnoj osnovi.

## VII

Daje se saglasnost za zaključivanje Supsidijarnog sporazuma o zajmu između Bosne i Hercegovine i Federacije i Podugovora o zajmu između Federacije i Unsko-sanskog Kantona za zajam iz tačke I ove Odluke.

Za potpisivanje Supsidijarnog sporazuma i odgovarajućeg Podugovora o zajmu ovlašćuje se federalni ministar finansija - federalni ministar financija.

## VIII

Za realizaciju ove Odluke i izvještavanje zadužuje se Federalno ministarstvo finansija - Federalno ministarstvo financija, Ministarstvo finansija Unsko-sanskog Kantona, Ministarstvo obrazovanja, nauke, kulture i sporta Unsko-sanskog Kantona i JU Univerzitet u Bihaću, svako u okviru svoje nadležnosti.

## IX

Implementacija Sporazuma iz tačke I ove Odluke, ne zahtijeva donošenje novih ili izmjenu postojećih zakona.

## X

Ova Odluka stupa na snagu narednog dana od dana objavljivanja u "Službenim novinama Federacije BiH".

## O B R A Z L O Ž E N J E

### Pravni osnov

Pravni osnov za donošenje ove Odluke sadržan je u članu 40. stav 5. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br: 86/07, 24/09 i 44/10), koji propisuje pitanja vanjskog zaduženja Federacije i procedure za zajmove. Izmjenom Zakona o dugu, zaduživanju i garancijama u Federaciji Bosne i Hercegovine („Službene novine Federacije BiH“, broj: 44/10) u članu 40. stav 5. predviđeno je da Vlada Federacije Bosne i Hercegovine nakon prihvatanja nacrta kreditnog sporazuma i utvrđivanja **Prijedloga** odluke, istu dostavlja Parlamentu Federacije BiH na usvajanje.

### Razlozi za donošenje

Projektom je predviđeno opremanje savremenom tehničkom, laboratorijskom i nastavnom opremom svih visokoškolskih institucija na Univerzitetu u Bijaču. Osnovni ciljevi Projekta su osavremenjivanje nastavnog procesa i podizanje opremljenosti laboratorija, kabineta i učionica, te podizanje standarda nastavnog procesa i laboratorijskih vježbi na viši nivo. Projekt će omogućiti proces sticanja znanja, upoznavanja sa najnovijim tehničkim i tehnološkim dostignućima u modernom nastavnom procesu te druge pozitivne efekte u nastavnom i naučnoistraživačkom radu.

Velike efekte od ovog projekta imat će generacije studenata, ali i nastavno osoblje uključeno u nastavne, naučne i istraživačke procese na Univerzitetu

### Obrazloženje pojedinih tačaka

**Tačka I** je nužna kako bi se prihvatilo zaduženje Federacije BiH kod Raiffeisen Bank International AG.

**Tačkom II** potvrđuje se namjena utroška sredstava zajma.

**Tačkom III.** precizirani su uslovi zajma.

**Tačkom IV** potvrđuje se da je dokumentacija parafirana tokom pregovora s Raiffeisen Bank International AG prihvatljiva za Federaciju BiH, što je uvjet da Bosna i Hercegovina i Raiffeisen Bank International AG, pristupe potpisivanju Sporazuma o zajmu.

**Tačkom V** se definira način implementacije Projekta, te da nije potrebno osigurati dodatna sredstva u Budžetu Federacije za ovu namjenu.

**Tačkom VI** se definira obaveza Federalnog ministarstva finansija-Federalnog ministarstva financija da sa Unsko-sanskim Kantonom usaglasi i sklopi odgovarajući Podugovor o zajmu.

**Tačkom VII** daje se saglasnost za zaključivanje Supsidijarnog sporazuma o zajmu sa Bosnom i Hercegovinom i Podugovora o zajmu sa Unsko-sanskim kantonom i daje se ovlaštenje federalnom ministru finansija - federalnom ministru financija da u ime Federacije potpiše iste.

**Tačkom VIII** se definira da se za realizaciju ove Odluke i izvještavanje zadužuje Federalno ministarstvo finansija - Federalno ministarstvo financija, Ministarstvo finansija Unsko-sanskog Kantona, Ministarstvo obrazovanja, nauke, kulture i sporta Unsko-sanskog Kantona i JU Univerzitet u Bijaču, svako u okviru svoje nadležnosti.

**Tačkom IX** se potvrđuje da za implementaciju Sporazuma o kreditu nije potrebno donijeti nove ili izmijeniti postojeće zakone.

**Tačkom X** propisuje se stupanje na snagu ove Odluke.